


Llwybr y Mwynwyr, Yr Wyddfa

ANODD/LLAFURUS



Trosolwg o'r Daith



Pellter: 13km (8 milltir)



Hyd: 6 awr




Math o daith: Yno ac yn ôl



Cyn i chi gychwyn

Darllenwch y wybodaeth diogelwch a graddio llwybrau ar wefan Awdurdod Parc Cenedlaethol Eryri cyn i chi gychwyn ar eich taith.

eryri.llyw.cymru



Dechreua'r llwybr yng nghornel bellaf chwith maes parcio Pen y Pass, gyferbyn â'r fynedfa.




Bydd y llwybr yn fforchio ger Llyn Llydaw. Cadwch i'r dde ac fe ddowch at sarn sy'n croesi'r llyn.




Croeswch y sarn a dilynwch y llwybr gan fynd heibio adfeilion hen felin falu Gwaith Copr Britannia ar y dde i chi, cyn dringo'n serth at Lyn Glaslyn.




Hyd heddiw, mae adfeilion yr hen felin falu i'w gweld ger Llyn Llydaw, ac ymysg y gweddillion mae'r morthwyllion malu mawr a ddefnyddiwyd i echdynnu'r mwyn gwerthfawr.



O Lyn Glaslyn, cadwch olwg am faen hir ger adfeilion hen farics, a dilynwch y llwybr i'r dde sy'n dringo'n serth dros y sgri. Mae'r rhan hon o'r daith yn ddringfa galed a gall fod yn hynod o lithrig. Pan fydd rhew ac eira ar y llwybr, gwell gadael gweddill y daith i gerddwyr profiadol gyda'r offer cywir.




Yn y man fe ddewch at faen hir sy'n nodi'r gyffordd gyda Llwybr Pyg (cofiwch amdani ar eich ffordd i lawr). O'r fan yma mae'r llwybr yn parhau i ddringo'n serth ac yn rhydd dan draed nes y cyrhaeddwch Fwlch Glas.



Ymhen ychydig, bydd y llwybr yn dringo'n igam ogam i fyny i Fwlch Glas.



Ym Mwlch Glas, fe fyddwch yn ymuno â Llwybr Llanberis a Llwybr Cwellyn. Mae'r gyffordd hon wedi ei nodi â maen hir (cofiwch amdani ar eich ffordd i lawr).



Dilynwch y llwybr i'r chwith o'r maen hir. Rydych yn awr ar y rhan olaf o'ch taith i gopa'r Wyddfa. Wrth gerdded ar gyflymder hamddenol, gallwch ddisgwyl bod ar y copa ymhen rhyw chwarter awr.



O'r copa ar ddiwrnod clir, cewch eich gwobrwyo â golygfeydd anhygoel - mae'n bosib gweld 18 o lynnoedd ac 14 copa dros 914m (3000 troedfedd). Weithiau, gallwch hyd yn oed weld mor bell â'r Iwerddon, Ynys Manaw ac Ardal y Llynnoedd.